

Minister Romero: "Y lo constitui un pilar economico nobo pa Aruba"

E proyecto di Fast Ferry lo ta di beneficio principal pa San Nicolas

ORANJESTAD (AAN): Durante conferencia di prensa di Gobierno, Minister di Transporte, Comunicacion y Sector Primario, sr. Chris Romero, a elabora ampliamente riba e desaroyonan recien di e proyecto di e Fast Ferry cu lo keda ubica na San Nicolas.

Gabinete Wever-Croes

ta apoya e proyecto di Fast Ferry totalmente y como tal e ta un di e prioridatnan inmediato pa haci esaki bira realidad den un tempo relativamente corto.

Pa e proceso cuminsa cana su caminda, Minister Chris Romero a opta pa trece for di Hulanda e experto di Fast Ferry, sr. Ton Janssen,

y asina hunto cun'e sinta cu tur stakeholders concerni y asina scucha nan deseonan y sugerencianan pa realisacion di e gran proyecto aki.

Tambe lo sinta na mesa cu departamentonan gubernamental cu lo bay ta directamente involucra cu e Fast Ferry, entre otro Inmigracion y Douane, pa

asina por tin un idea mas concreto di e controlnan cu mester implementa.

E titular di Transporte ta convenci cu mester bin mas claridad pa cu e proyecto di Fast Ferry y den cuadro di esaki e lo bay Parlamento pa duna informacion y tambe pa scucha sugerencia. Den conseho di Minister tambe



lo trata e proyecto di Fast Ferry di un manera mas profundo y cu presenencia di e experto, sr. Ton Janssen, pa duna claridad na cualkier duda of pregunta cu por surgi.

Aire nobo pa San Nicolas

Minister Chris Romero tin e conviccion cu e realisacion di e proyecto di Fast Ferry na San Nicolas lo sa di trece un speranza nobo pa e pueblo di P'ariba di Brug, cu tanto a wordo negligisha pa Gobiernonan anterior. Como un persona naci, cu a lanta y biba semper P'ariba di Brug, Minister Romero ta kere firmemente cu e proyecto di Fast Ferry na San Nicolas lo ta e pilar economico cu finalmente lo impulsa e comercio di P'ariba, treciendo beneficio pa henter Aruba.

Pilar economico nobo

No solamente e proyecto di Fast Ferry lo engrandece nos turismo, pero tambe e lo ta un pilar economico nobo pa nos isla. E lo trece prosperidad pa San Nicolas, na mes momento cu lo bira un pilar economico riba su mes door di crea un comercio directo entre Aruba, Boneiro y Corsou.

E Fast Ferry lo traduci den prosperidad pa Aruba, pero specialmente pa e area di P'ariba di brug cu a keda negligisha pa tanto decada. A yega ora pa San Nicolas luci cu tur e bon cu e tin pa ofrece y Gabinete Wever-Croes ta percurando pa haci esaki bira un realidad.